



Centralna banka  
BOSNE I HERCEGOVINE  
Централна банка  
БОСНЕ И ХЕРЦЕГОВИНЕ



## SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA

---

29.07.2024. – 02.08.2024.

ODJELJENJE ZA BANKARSTVO, SLUŽBA FRONT OFFICE



**Sarajevo, 05.08.2024. godine**

**SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA**  
**29.07.2024. – 02.08.2024.**


*Tabela 1: Prikaz kretanja prinosa na državne obveznice*

Prinosi	Eurozona			SAD			Velika Britanija			Japan		
	26.7.24	-	2.8.24	26.7.24	-	2.8.24	26.7.24	-	2.8.24	26.7.24	-	2.8.24
2 godine	2,62	-	2,35	4,38	-	3,88	3,92	-	3,60	0,40	-	0,41
5 godina	2,33	-	2,08	4,07	-	3,62	3,90	-	3,59	0,64	-	0,57
10 godina	2,41	-	2,17	4,19	-	3,79	4,10	-	3,83	1,07	-	0,95

*Tabela 2: Prikaz kretanja prinosa na njemačke Bubillove*

Dospijeće	Prinosi		
	26.7.24	-	2.8.24
3 mjeseca	3,428	-	3,363
6 mjeseci	3,313	-	3,170
1 godina	3,081	-	2,843

*Graf 1: Prikaz krivulja prinosa državnih obveznica*



Graf prikazuje krive prinosa Njemačke (zelena), SAD (plava), Velike Britanije (crvena) i Japana (ljubičasta) za periode od 3 mjeseca do 30 godina na dane 02.08.2024. godine (pune linije) i 26.07.2024. godine (isprekidane linije). Na donjem dijelu grafa je prikazana razlika između vrijednosti odgovarajućih prinosa na navedene datume.

## EUROZONA

U protekloj sedmici prinosi obveznica eurozone su zabilježili priličan pad nakon što je došlo do rasta vjerovatnoće da će Fed možda trebati smanjiti kamatne stope više puta ove godine, a pod uticajem slabih ekonomskih podataka koji su objavljeni u posmatranom periodu. Prinosi njemačkih obveznica su smanjeni između 23 i 27 baznih poena, prinosi francuskih obveznica između 15 i 20 baznih poena, a prinosi italijanskih obveznica između 13 i 32 bazna poena. Slabi podaci sa tržišta SAD imali su veći uticaj na kretanje prinosa od podataka koji su objavljeni za eurozonu, posebno ako se u obzir uzme da je stopa inflacije u eurozoni u junu zabilježila neočekivan rast u odnosu na prethodni mjesec. Različito kretanja inflacije u pojedinačnim članicama eurozone bi moglo dodatno otežati donošenje odluke o dodatnom smanjenju kamatnih stopa ECB u septembru. S druge strane, podaci o rastu BDP-a eurozone bili su bolji od očekivanja, s tim da je na nivou pojedinačnih članica situacija slična kao sa inflacijom, pa je naprimjer u Njemačkoj umjesto očekivanog blagog rasta zabilježen pad BDP-a (-0,1%).

Član IV ECB Schnabel je naglasila da ECB pomno prati stalni rast cijena u uslužnom sektoru kako bi osigurala da to ne ometa povratak inflacije na ciljani nivo od 2%, navodeći da inflacija, posebno u ovom sektoru, i dalje izaziva značajnu zabrinutost, što opravdava detaljniji nadzor. Član UV ECB Vujčić je izjavio da će ECB imati jasniju sliku o tome šta treba učiniti kada se članovi sastanu u septembru, kada će imati više potrebnih podataka, kao i nove ekonomske prognoze, dok je član UV ECB Stournaras izjavio da će ECB možda morati dodatno smanjiti kamatne stope kako bi pomogla ekonomiji regije koja se bori, sa još moguća dva smanjenja kamatnih stopa ove godine ukoliko se proces pada inflacije nastavi kao što je očekivano.

Anketa koju je provela Industrijska i privredna komora Njemačke (DIHK) je pokazala da 18% kompanija (od ukupno 3.300 učesnika) razmišlja o smanjenju proizvodnje ili o premještanju proizvodnje van zemlje, što je više od 11%

Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.

kompanija iz ankete obavljene 2022. godine. Anketa je pokazala da rastući troškovi i neizvjesna ponuda energenata ometaju proizvodnju i investicije u Njemačkoj. Ministar finansija Njemačke Lindner je izjavio da nacrt budžeta Njemačke sadrži “ustavne rizike“ i naglasio da sve mjere moraju biti u skladu sa Ustavom i ekonomski razumne. Pored toga, trenutni nacrt budžeta ukazuje na manjak od 5 milijardi EUR, a Lindner insistira na smanjenju duga, koje je prije bilo suspendovano zbog hitnih mjera u vrijeme pandemije i krize u Ukrajini.

**Tabela 3: Kretanje ekonomskih indikatora za eurozonu**

Red. br.	Ekonomski indikator		Očekivanje	Stvarno stanje	Prethodni period
1.	Stopa inflacije – EZ (prelim.)	JUL	2,5%	<b>2,6%</b>	2,5%
2.	Temeljna stopa inflacije – EZ (prelim.)	JUL	2,8%	<b>2,9%</b>	2,9%
3.	Proizvođačke cijene – Italija (G/G)	JUN	-	-3,5%	-4,9%
4.	Proizvođačke cijene – Francuska (G/G)	JUN	-	-6,0%	-6,7%
5.	Proizvođačke cijene – Austrija (G/G)	JUN	-	-2,5%	-3,5%
6.	BDP – EZ (Q/Q) prelim.	II kvartal	0,2%	<b>0,3%</b>	0,3%
7.	BDP – Njemačka (Q/Q) prelim.	II kvartal	0,1%	-0,1%	0,2%
8.	BDP – Francuska (Q/Q) prelim.	II kvartal	0,2%	0,3%	0,3%
9.	BDP – Španija (Q/Q) prelim.	II kvartal	0,5%	0,8%	0,8%
10.	BDP – Italija (Q/Q) prelim.	II kvartal	0,2%	0,2%	0,3%
11.	BDP – Austrija (Q/Q) prelim.	II kvartal	-	0,0%	0,2%
12.	BDP – Belgija (Q/Q) prelim.	II kvartal	-	0,2%	0,3%
13.	BDP – Irska (Q/Q) prelim.	II kvartal	-	1,2%	0,7%
14.	PMI indeks prerađivačkog sektora – EZ (final.)	JUL	45,6	45,8	45,8
15.	Maloprodaja – Holandija (G/G)	JUN	-	-0,7%	3,8%
16.	Maloprodaja – Italija (G/G)	JUN	-	-1,0%	0,5%
17.	Potrošnja stanovništva – Francuska (G/G)	JUN	-0,2%	-1,0%	0,5%
18.	Prerađivačka proizvodnja – Francuska (G/G)	JUN	-	-2,0%	-3,8%
19.	Industrijska proizvodnja – Francuska (G/G)	JUN	-1,1%	-1,6%	-3,1%
20.	Industrijska proizvodnja – Italija (G/G)	JUN	-	-2,6%	-3,3%
21.	Industrijske prodaje – Italija (G/G)	MAJ	-	-4,8%	-2,2%
22.	Stopa nezaposlenosti – EZ	JUN	6,4%	<b>6,5%</b>	6,4%
23.	Stopa nezaposlenosti – Njemačka	JUN	6,0%	6,0%	6,0%
24.	Stopa nezaposlenosti – Belgija	JUN	-	5,9%	5,9%
25.	Stopa nezaposlenosti – Italija	JUN	6,8%	7,0%	6,9%
26.	Stopa nezaposlenosti – Grčka	JUN	-	9,6%	10,3%
27.	Promjena broja nezaposlenih – Španija (u '000)	JUL	-	-10,8	-46,8
28.	Indeks ekonomskog povjerenja – EZ	JUL	95,2	95,8	95,9

## SAD

FOMC je na prošlosedmičnoj sjednici, u skladu sa očekivanjima, zadržao referentnu kamatnu stopu u ciljanom rasponu od 5,25% do 5,50%. Odluka o zadržavanju referentne kamatne stope na istom nivou od jula prošle godine je donesena jednoglasno. Predsjednik Feda Powell je ukazao na to da će Fed vjerovatno smanjiti kamatne stope u septembru, izuzev znatnijeg zastoja u napretku usporavanja inflacije. Powell je naglasio da će smanjenje referentne kamatne stope zavisiti od ekonomskih podataka koji ispunjavaju očekivanja i istakao prelazak Feda sa fokusiranja isključivo na inflaciju na razmatranje stabilnosti tržišta rada. Istakao je kako je stopa nezaposlenosti porasla na 4,1%, ali su otpuštanja radnika i dalje umjerena. Također je izrazio uvjerenje da tržište rada ne treba dalje da slabi kako bi Fed postigao ciljanu inflaciju od 2%. Naglasio je važnost balansiranja rizika preranog smanjenja kamatnih stopa, što bi moglo ponovo pokrenuti inflaciju, u odnosu na prekasno, što bi potencijalno moglo naštetiti tržištu rada. Pod uticajem signala predsjednika Feda o vjerovatnom smanjenju referentne kamatne stope u septembru, prinosi američkih državnih obveznica su zabilježili oštro smanjenje duž cijele krive. Doprinos smanjenju prinosa državnih obveznica dalo je i objavljivanje ekonomskih podataka, posebno loših podataka

### Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.


sa tržišta rada, koji su objavljeni krajem sedmice. Nakon sastanka FOMC-a na kojem je predsjednik Powell signalizovao potencijalno popuštanje monetarne politike u septembru, trgovci na tržištu fjučersa klade se na tri smanjenja kamatnih stopa ove godine. Također, **nakon objavljenih loših podataka sa tržišta rada, vjerovatnoća smanjenja referentne kamatne stope za 50 baznih poena u septembru iznosi preko 60%.**

Ministarstvo finansija SAD je smanjilo procjenu zaduživanja za tekući kvartal i projektovalo je pad gotovinskog bafera vlade do kraja godine, što bi potencijalno dovelo do borbe za ograničenje duga. Ministarstvo finansija sada procjenjuje 740 milijardi USD neto zaduživanja za period juli–septembar, što je manje u odnosu na prethodnih 847 milijardi USD.

**Tabela 4: Kretanje ekonomskih indikatora za SAD**

Red. br.	Ekonomski indikator		Očekivanje	Stvarno stanje	Prethodni period
1.	Stopa nezaposlenosti	JUL	4,1%	<b>4,3%</b>	4,1%
2.	Promjena zaposlenih nefarmerski sektor	JUL	175.000	<b>114.000</b>	179.000
3.	Promjena zaposlenih privatni sektor	JUL	140.000	<b>97.000</b>	136.000
4.	Promjena zaposlenih prerađivački sektor	JUL	-5.000	<b>1.000</b>	-9.000
5.	PMI indeks prerađivačkog sektora F	JUL	49,5	49,6	51,6
6.	ISM indeks prerađivačkog sektora	JUL	48,5	46,8	48,5
7.	Broj zahtjeva za hipotekarne kredite	26. jul	-	-3,9%	-2,27%
8.	Indeks potrošačkog povjerenja	JUL	99,7	100,3	97,8
9.	Inicijalni zahtjevi nezaposlenih za pomoć	27. jul	236.000	249.000	235.000
10.	Kontinuirani zahtjevi nezaposlenih za pomoć	20. jul	1.855.000	1.877.000	1.844.000
11.	ADP promjena broja zaposlenih	JUL	150.000	122.000	155.000

**Graf 2: Kretanje kursa EURUSD tokom protekle sedmice**



USD je deprecirao u odnosu na EUR, te je kurs EURUSD zabilježio rast sa nivoa od 1,0856 na nivo od 1,0911.

## VELIKA BRITANIJA

Prinosi obveznica Velike Britanije su smanjeni između 27 i 32 bazna poena tokom prošle sedmice. **BoE je 1. augusta donijela odluku da referentnu kamatnu stopu smanji za 25 baznih poena na 5,0%, što predstavlja prvo smanjenje još od 2020. godine, iako je glasanje bilo veoma usko sa omjerom 5:4 u korist smanjenja.** Prije održavanja sjednice MPC BoE tržišta su ovakvu odluku očekivala sa vjerovatnoćom od 50%. Guverner Bailey je izjavio da BoE mora biti pažljiva kako kamatne stope ne bi bile snižene prebrzo ili previše, izražavajući nesigurnost u vezi s tim da li je uporna inflacija dosljedna cilju centralne banke (2%). On je upozorio da bi inflacija cijena usluga mogla blago porasti u augustu, prije nego što nastupi njeno opadanje tokom ostatka godine. Nakon ovakve odluke na finansijskim tržištima su povećana očekivanja za smanjenje kamatnih stopa u narednoj godini. Glavni ekonomista BoE Pill, koji je na sjednici glasao protiv smanjenja kamatnih stopa, upozorio je na očekivanja dodatnog smanjenja kamatnih stopa u bliskoj budućnosti te naveo da, uprkos progresu u smanjenju inflacije, ovaj zadatak još uvijek nije okončan i da još uvijek postoje znakovi da kompanije utiču na rasta cijena.

GBP je deprecirala nakon reagovanja tržišta na komentare ministrice finansija Reeves, koja je revidirala javnu potrošnju Velike Britanije, otkrivajući manjak od 21,9 milijardi GBP koji je ostavila prethodna administracija. Kako bi riješila ovaj problem, ona je najavila ukidanje zimskog plaćanja grijanja za 10 miliona penzionera, prekidanje nekih projekata izgradnje puteva i željeznica i ponovno razmatranje postojećeg programa izgradnje bolnica. Reeves je nagovijestila planove o povećanju poreza u svom prvom budžetu koji treba da bude pripremljen u oktobru, a u cilju rješavanja problema deficita naslijeđenog od prethodne Vlade. Reeves je obećala da neće povećavati porez na dohodak, nacionalno osiguranje i PDV, ali nije isključila povećanja poreza na kapitalne dobitke i nasljedstvo, te

### **Odricanje od odgovornosti (Disclaimer)**

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.



penzionu reformu. Premijer Starmer je sazvao hitni sastanak kako bi se posvetila pažnja anti imigrantskim protestima koji su održani u nekoliko gradova, a koji su zbog lažnih optužbi doveli do napada na azilante i povrede policajaca. Objavljeni podaci su pokazali da je juli za britanske fabrike bio najbolji mjesec u posljednje dvije godine. Output, zapošljavanje i optimizam su porasli nakon što je premijer Starmer pobijedio na izborima. Output i nove narudžbe imali su najznačajniji rast od februara 2022. godine, a proizvođači su zapošljavali nove radnike prvi put u posljednja 22 mjeseca. Međutim, rastući troškovni pritisci su malo umanjili ove pozitivne izgleda, jer su cijene inputa i outputa dostigle svoje najviše nivoe još od prve polovine prethodne godine.

**Tabela 5: Kretanje ekonomskih indikatora za UK**

Red. br.	Ekonomski indikator		Očekivanje	Stvarno stanje	Prethodni period
1.	PMI indeks prerađivačkog sektora (final.)	JUL	51,8	52,1	50,9
2.	Monetarni agregat M4 (G/G)	JUN	-	1,0%	0,3%
3.	Neto potrošački krediti (u milijardama GBP)	JUN	1,3	1,2	1,5
4.	Broj odobrenih hipotekarnih kredita (u '000)	JUN	60,3	60,0	60,0
5.	Nationwide indeks cijena kuća (G/G)	JUL	1,8%	2,1%	1,5%

Tokom protekle sedmice GBP je deprecirala u odnosu na EUR, pa je kurs EURGBP zabilježio rast sa nivoa od 0,84373 na nivo od 0,85210. GBP je deprecirala i u odnosu na USD, pa je kurs GBPUSD smanjen sa nivoa od 1,2867 na nivo od 1,2801.

## JAPAN

**BoJ je protekle sedmice odlučila da poveća referentnu kamatnu stopu na nivo "oko 0,25%" sa nivoa 0–0,10%, a što predstavlja najviši nivo još od 2008. godine i nagovijestila mogućnost njihovog daljeg rasta.** BoJ je ovim potezom povećanjem kamatnih stopa i otkrivanjem detaljnog plana za smanjenje nivoa kupovina obveznica iznenadila tržišta, signalizujući značajan korak prema ukidanju stimulansa koji su se primjenjivali cijelu deceniju. Guverner Ueda nije isključio mogućnost još jednog rasta kamatnih stopa ove godine, te je istakao spremnost BoJ da nastavi sa povećanjem kamatnih stopa na nivoe koji se smatraju neutralnim za ekonomiju. Ovakvi komentari, koji favorizuju rast kamatnih stopa, naišli su na nespremno tržište, te su uticali na pad kursa USDJPY na nivo ispod 151 prvi put od marta, jer su investitori uvidjeli da Japan konačno ulazi u stvarni ciklus rasta kamatnih stopa. **Što se tiče plana smanjenja kupovina obveznica, BoJ je odlučila da prepolovi svoje kupovine na 3 biliona JPY (19,6 milijardi USD) sa dosadašnjih 6 biliona JPY do prvog kvartala 2026. godine,** što će smanjiti njen bilans stanja za čak do 8%. Program masovnih kupovina obveznica počeo je 2013. godine i često je optuživan za negativne uticaje na tržište Japana. Prognoze temeljne inflacije za 2024. fiskalnu godinu smanjene su na 2,5% sa 2,8%, ali su za fiskalnu 2025. godinu povećane na 2,1% sa 1,9%. Analitičari očekuju da referentna kamatna stopa vremenom dostigne 1%, uz predviđanja da će kamatne stope do kraja naredne godine dostići 0,75%.

**Tabela 6: Kretanje ekonomskih indikatora za Japan**

Red. br.	Ekonomski indikator		Očekivanje	Stvarno stanje	Prethodni period
1.	Stopa nezaposlenosti	JUN	2,6%	2,5%	2,6%
2.	Maloprodaja (G/G)	JUN	3,2%	3,7%	2,8%
3.	Industrijska proizvodnja (G/G) P	JUN	-6,4%	-7,3%	1,1%
4.	Indeks potrošačkog povjerenja	JUL	3,6	36,7	36,4
5.	PMI indeks prerađivačkog sektora F	JUL	49,2	49,1	50,0
6.	Monetarna baza (G/G)	JUL	-	1,0%	0,6%

JPY je tokom protekle sedmice aprecirao u odnosu na EUR, te je kurs EURJPY zabilježio pad sa nivoa od 166,93 na nivo od 159,91. JPY je aprecirao i u odnosu na USD, te je kurs USDJPY zabilježio pad sa nivoa 153,76 na nivo od 146,53. Kurs USDJPY je na sedmičnom nivou smanjen za 4,70%, a što ujedno predstavlja petu sedmicu zaredom da ovaj kurs bilježi smanjenje.


### Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.

## **NAFTA I ZLATO**

Cijena jednog barela sirove nafte na otvaranju tržišta u ponedjeljak je iznosila 77,16 USD (71,08 EUR). Tokom protekle sedmice cijena nafte je bilježila trend pada, s izuzetkom sredine sedmice. Početkom sedmice cijena ovog energenta je bilježila smanjenje, zbog sve veće zabrinutosti oko potražnje, uprkos eskalaciji geopolitičkog rizika na području Bliskog istoka. Pad cijene ovog energenta pripisuje se sumnjama u snagu globalne potražnje, posebno iz Kine, najvećeg svjetskog uvoznika nafte. U srijedu je cijena nafte zabilježila najveći dnevni rast od polovine oktobra prošle godine (4,26%). Tenzije na Bliskom istoku, uključujući ubistvo lidera Hamasa u Iranu, su privremeno zasjenile zabrinutost zbog slabe potražnje u Kini. Pored toga, zalihe sirove nafte i benzina u SAD su zabilježile značajan pad zbog snažne izvozne potražnje, sa smanjenjem zaliha sirove nafte za 3,4 miliona barela, a zaliha benzina za 3,7 miliona barela. Prema podacima koje je objavio API, zalihe sirove nafte u SAD su smanjene za 4,49 miliona barela u sedmici koja se završila 26. jula, nadmašivši očekivanja (-2,33 miliona) barela. Ovo je peta uzastopna sedmica smanjenja zaliha prema izvještajima API-ja, a što predstavlja ukupno smanjenje od 24 miliona barela u ovom periodu. Međutim, već u četvrtak cijena nafte je ponovo zabilježila smanjenje, jer zabrinutost zbog usporavanja ekonomije SAD preovladava u odnosu na strahove da bi sukob na Bliskom istoku mogao poremetiti isporuke ovog energenta. Fokus tržišnih učesnika protekle sedmice je bio na sastanku OPEC+, koji je održan 1. augusta, nakon kojeg nisu izdate nikakve konkretne preporuke. OPEC+ je u junu najavio da, počevši od oktobra, planira postepeno obnavljanje proizvodnje zaustavljene krajem 2022. godine, sa oko 540.000 barela dnevno koji će biti dodati u IV kvartalu. Krajem sedmice cijena nafte je nastavila bilježiti prilično smanjenje, jer su slabi ekonomski podaci u SAD izazvali strah od smanjenja globalne potražnje za gorivom, a što je nadmašilo strah od poremećaja u snabdijevanju zbog pojačanih tenzija na Bliskom istoku. Na zatvaranju tržišta u petak cijena jednog barela sirove nafte je iznosila 73,52 USD (67,38 EUR). Cijena nafte je smanjena četvrtu sedmicu zaredom i u odnosu na prethodnu sedmicu je smanjena za 4,72%.


**Graf 3: Kretanje cijene nafte tokom protekle sedmice**



Na otvaranju londonske berze metala u ponedjeljak cijena jedne fine unce zlata je iznosila 2.387,19 USD (2.198,96 EUR). Od utorka je cijena zlata imala tendenciju rasta. Geopolitičke tenzije, uključujući eskalaciju napada između Izraela i militantne grupe Hezbolah, predstojeći izbori u SAD, te jačanje očekivanja o smanjenju kamatnih stopa u SAD u septembru, su ključni faktori koji podržavaju cijenu ovog plemenitog metala. Početkom sedmice cijena zlata je blago smanjena, dok su investitori bili u iščekivanju odluka sa sastanka FOMC-a. Uprkos aprecijaciji USD i ekonomskim podacima, a usljed blagog pada prinosa američkih državnih obveznica, cijena zlata je zabilježila rast u utorak. Također, cijena zlata je povećana nakon što je objavljena vijest da je Izrael uzvratilo Libanu u znak odmazde za napad na Golansku visoravan. Cijena ovog plemenitog metala je nastavila bilježiti rast i u srijedu nakon što je Fed na sjednici nagovijestio potencijalno smanjenje kamatnih stopa u septembru. Rast geopolitičkih tenzija na Bliskom istoku je, također, faktor koji je doprinio rastu cijene ovog plemenitog metala.

Prema podacima World Gold Councila neto kupovine zlata od strane centralnih banaka su povećane za 6% u odnosu na isti period prethodne godine, odnosno na 184 tone, a u cilju zaštite portfolija i u skladu sa potrebama za diverzifikacijom. Zlato koje se koristi u tehnologiji poraslo je za 11% na godišnjem nivou zbog tekućeg trenda AI. Ukupne zalihe zlata porasle su za 4% u odnosu na isti period prethodne godine, na 1.258 tona, pri čemu je proizvodnja u rudnicima dostigla rekord u II kvartalu (929 tona). Izgledi za tekuću godinu sugerisu da bi zapadni tokovi investicija mogli nadoknaditi slabiju potražnju potrošača i potencijalno sporiju kupovinu od strane centralnih banaka. U četvrtak je cijena zlata nastavila bilježiti rast, koji je bio podržan objavljivanjem slabih američkih ekonomskih podataka, povećanim očekivanjima oko smanjenja kamatnih stopa od strane glavnih centralnih banaka kao što su Fed i BoE (koja je smanjila kamatne stope za 25 baznih poena u četvrtak). Na zatvaranju tržišta u petak cijena jedne fine unce zlata je iznosila 2.443,24 USD (2.239,24 EUR). Cijena zlata je zabilježila rast za 2,35% u odnosu na prethodnu sedmicu.

**Graf 4: Kretanje cijene zlata tokom protekle sedmice**



### **Odricanje od odgovornosti (Disclaimer)**

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.